

27/03/2001

Format baru terus janjikan masa depan sepak takraw

Hussain Said

DI SEBALIK insiden kekecohan membabitkan penyokong, Kejohanan Sepak Takraw Grand Prix (GP) Kebangsaan Terbuka Selangor membuktikan permainan tradisi itu masih mempunyai masa depan gemilang di pentas antarabangsa.

Segala-galanya kerana format baru pertandingan yang mewajibkan setiap pasukan yang bertanding menyenaraikan regu di bawah 22 dan bawah 35 tahun.

Kerana format baru itu terutama dengan kelulusan membenarkan pemain di bawah 22 beraksi, saingan pembuka tirai GP musim 2001 itu yang berlangsung di Dewan MBSA, Seksyen 19, Shah Alam, membuktikan kita sebenarnya tidak ketandusan bakat pelapis berwibawa.

Rumusan itu terbukti dengan aksi meyakinkan pemain bawah 22, malah, aksi dan corak permainan yang dipamerkan mereka, tampak lebih baik berbanding pemain senior.

Secara tidak langsung juga, keputusan Jawatankuasa Pertandingan Persatuan Sepaktakraw Malaysia (PSM) memperkenalkan format baru itu menyaksikan persatuan negeri kini lebih memberi penekanan kepada program pembangunan.

Sebelum ini, persatuan negeri tampak lebih banyak bergantung harap kepada pemain senior untuk menggalas cabaran mereka tanpa memikirkan program pembangunan terancang.

Pengurus pasukan Kelantan, Mohd Adnan Mat, berkata format baru terutama dengan kehadiran regu bawah 22 beraksi tambah menghidupkan pertandingan yang diperkenalkan sejak 1994 itu.

"Jika sebelum ini kita hanya menyaksikan pemain sama beraksi dalam setiap pertandingan GP dan kadangkala menerbitkan rasa jemu tetapi saingan pembuka tirai ini mencetuskan senario berbeza.

"Segala-galanya kerana kehadiran pemain bawah 22 yang tampak tidak kurang hebat, malah, ada di antara mereka lebih baik berbanding pemain senior yang sudah lama beraksi dalam pertandingan ini.

"Secara langsung, kehadiran mereka menambah seri dan menghidupkan pertandingan ini. Lebih tepat, aksi memberangsangkan yang dipamerkan mereka membuktikan kita mempunyai barisan pelapis berwibawa," katanya semalam.

Sebagaimana yang diramal, Selangor membuat perhitungan dengan Kelantan dalam final yang berkesudahan tuan rumah mengatasi cabaran negeri Serambi Mekah itu 2-1 dalam tempoh 1 jam 54 minit.

Kejayaan Selangor itu menyaksikan mereka membawa pulang trofi dan hadiah kemenangan bernilai RM7,000, sementara Kelantan pula berpuas hati dengan RM5,000 yang disampaikan Datuk Bandar Shah Alam, Datuk Abu Sujak Mahmud.

Saingan kemuncak yang menarik dan mendebarkan itu bagaimanapun dicemari dengan insiden kekecohan membabitkan penyokong kedua-dua pasukan sejurus perlawanan tamat.

Ahli Jawatankuasa Pertandingan PSM, Mahathir Mohamad, berkata kejayaan sirkit pertama itu secara langsung menjawab segala kritikan terhadap format baru itu.

"Sebelum ini, rata-rata kepimpinan negeri tidak bersetuju dan mengkritik mengenai format baru itu tetapi hampir sebahagian mereka sudah mula membuka mata di sebalik tujuan utama pengenalan format baru itu.

(END)